

四庫全書

經部

欽定四庫全書

經部
大易緝說卷四

詳校官內閣學士臣尹壯圖

通政使司副使臣莫瞻菴覆勘

總校官進士臣綦 琪

校對官中書臣汪錫 魁

謄錄監生臣謝景 標

欽定四庫全書

大易緝說卷四

元 王申子 撰



乾下
巽上

小陰也畜止也為卦乾下巽上一陰得位而為成卦

之主上下五陽皆為所畜是陽之大為陰之小者所

畜故為小畜

小畜亨密雲不雨自我西郊

畜則必亨理之常也且一陰巽順而得位二五合志

而上行亦有致亨之道故曰亨雲陰物也陽上進而
陰畜之故有密雲之象陽上進而陰得時以畜止之
故陰陽不和又爲不雨之象我據成卦之四而言西
亦陰方二三四互爲兌故曰西郊皆以言陰爲主而
衆陽皆爲所畜也

彖曰小畜柔得位而上下應之曰小畜

以成卦之主釋卦名義柔得位謂以六居四得其正
位也上下應之謂一卦五陽皆從之也從之故爲所

畜是爲小者所畜故曰小畜

健而巽剛中而志行乃亨密雲不雨尚往也自我西郊
施未行也

以卦德釋彖辭前以六四一爻而言則一陰畜五陽
小畜之所以成卦也此以全卦之德言則三陽健而
進一陰巽而順二五皆剛居中合志而上行小畜之
所以能亨也雲者陰陽之氣畜而未和則雨矣今
雲猶得以上往是畜未極也故不和而不雨不雨故

施未行皆小畜之義

象曰風行天上小畜君子以懿文德

卦取一陰畜五陽言爲小者所畜也象取風行於天上言所畜者小也蓋昭回雲漢者天之文也風行於天之下以鼓動萬物者也今止行於天之上但能振耀天之文而功不及物是所畜者小而未大故君子象之以懿美其文德於身待時而後行也

初九復自道何其咎吉

復反也初以陽剛居健體志欲上行而爲四得時得位者所畜故復然初剛而得正雖爲所畜而復如自守以正不爲所畜者故曰復自道言雖爲彼所畜而復而吾實自復於道也故不曰无咎而曰何其咎宜其吉也

象曰復自道其義吉也

進退自得其宜吉可知也 或問曰舊說皆謂陽本在上之物雖與四爲應而不爲所畜蓋小畜畜不住

故陽剛進復于上而自道故何其咎而子不以為然
何也曰小畜以巽畜乾以陰止陽為卦義大畜以艮
畜乾以剛止健為卦義大畜下三爻可以類推若陽
得上進何以為畜若果如諸說畜不住則聖人不以
畜字名卦矣

九二牽復吉

二所乘之初為陰所畜亦既復矣所承之三又為陰
所畜說輻而不進矣二以陽處陰居中得中上又无

應故不待畜即與同類牽連而復是不自失其中者
也自能審進退而不失其中故吉

象曰牽復在中亦不自失也

亦者承前象辭而言謂初既以剛正而自道二亦以
剛中而不自失也亦有不與陰畜陽之意

九三輿說輻夫妻反目

三剛而不中居健之極无應而動四以陰柔畜之於
前三遂說輻止而就之是三自處不以正而四得而

制之也三既爲四所制而又體剛用剛心不能平故不相和而有夫妻反目之象其孟子所謂身不行道不行於妻子者乎

象曰夫妻反目不能正室也

以九居三本得其正唯剛躁而昵於陰爲陰所畜遂流於不正身不正而能正家者鮮矣

六四有孚血去惕出无咎

四以一陰當三陽之進宜有傷有懼而有咎者唯居

一卦之中而虛虛中故有孚且與五皆得其正故五以中實信而從之所謂得位而上下應之也五既信從則衆陽不容不從其所畜矣故血去故惕出而咎亦无也非得正而又有孚誠以合五之志其能免乎象曰有孚惕出上合志也

謂六四以當位中虛之字上合九五當位中實之志故能以柔畜剛而不見傷害也

九五有孚攣如富以其鄰

學如者牽攀相從也富者畜聚衆陽之實也易例以陽實爲富以如春秋傳以某師之以言能左右而用之也鄰臣鄰謂四也九五以陽剛中正之君行巽順柔克之道中實有孚故衆陽牽攀從之而爲之富然是富也雖五之孚有以致之然亦六四力也蓋小畜之時畜陽者四也而爲臣鄰又同巽體故五能之以畜聚衆陽衆陽之實盡爲五有故曰富以其鄰象曰有孚攣如不獨富也

言不獨九五有孚以畜聚衆陽之富亦六四有孚同
志以畜聚衆陽而爲之富也四五當位故皆有孚同
體故同志

上九旣雨旣處尚德載婦貞厲月幾望君子征凶

畜至於上極矣上九體陽用陰陰陽和矣故旣雨陽
之尚往者止矣故旣處昔之不雨者雨不處者處小
畜之道成也皆六四所尚巽順之德積滿以致之載
者積而滿也然陰柔用事終非正道不可不戒婦陰

也月亦陰也言以陰畜陽以柔制剛婦而固守此道則危故曰婦貞厲陰道之盛如月之幾於望矣爲君子者不可以有行行則必凶隨時而畜止可也

象曰既雨既處德積載也君子征凶有所疑也

陰之畜陽亦既極矣君子處斯之時其可无疑慮乎故有征凶之戒



乾 兌下
上

履行也故曰履不處也卦乃小畜反對畜止也履則

三陽在上而行矣三陽進進而上行六三一陰乘二陽而躡其後故爲行而不處之象又爲卦天上澤下天高在上而光接乎下澤卑在下而氣通于上此天地間粲然之禮也故又曰履者禮也禮亦人之所履故爲履

履虎尾不啞人亨

履以六三成卦三之象下迫於二陽之進上躡乎三陽之剛剛譬則虎也三譬則人之足也剛健之性進

而不反猶虎之不能回頭以害人也三又能柔順以調其剛強和說以平其威怒故有履虎尾不啞人之象如履危而无所傷所以能亨以卦義言爲和說而行天之道故亨

彖曰履柔履剛也

以成卦之主釋卦名義言三以兌之柔躡乾之後而履其剛也故曰履

說而應乎乾是以履虎尾不啞人亨剛中正履帝位而

不疚光明也

以卦德釋彖辭而取九五以爲訓也格彊暴者以柔不以剛平忿怒者以和不以競故以允之說應乾之剛則雖如履虎尾之危而不爲所傷也是以能亨以九五剛中正而履帝位其亨也宜盛大而光明唯其所行一於用剛故不免有夬履之疵引之以釋彖者見履之道尚柔不尚剛也

象曰上天下澤履君子以辨上下定民志

天上下澤又下之下者而光潤相接此天地間燦然之禮也君子象此制禮以爲民之防辨上下之分以定其志蓋上下之分明而後民志定民志定然後天下可得而治也

初九素履往无咎

素有先定之義素履者平日之踐履也君子於世幼而學壯而行乃其道也九居履之初以陽剛之才居得其正是踐履有其素也有此素履用之則行何咎

之有

象曰素履之往獨行願也

願志願也素履先定故往而行行其志耳

九二履道坦坦幽人貞吉

履之時六三履剛而上進矣二有同于上无阻於前
若與三俱進則履道坦坦平且易也然二剛介居中
以陰自晦而不應於上是幽人貞固者之所爲也於
衆進之時獨貞固其守而安於靜吉可知也

象曰幽人貞吉中不自亂也

言不以衆皆進而易其所守之中是不以利欲亂其中者也

六三眇能視跛能履履虎尾咥人凶武人爲于大君

三以陰居陽以柔履剛謂其明耶則衆陽而獨陰謂其不明耶則又居於陽眇能視之象也謂其能行耶則衆剛而獨柔謂其不能行耶則又履乎剛跛能履之象也是體暗而用明才弱而志剛者也而又不中不

正故不自度量而一於進敢於蹈危取禍如履虎尾而受噬人之凶也若不顧強弱勇猛直前唯武人用之以有爲於大君之事則可然彖亦主三而言曰不噬人亨此曰噬人凶何也蓋彖總言一卦之體爻則據其時與位而言所以不同故曰易之爲道也屢遷象曰眇能視不足以有明也跛能履不足以與行也噬人之凶位不當也武人爲于大君志剛也

三質暗才弱本不足以有爲以當履之時一陰爲主

適與時遇是以不顧其位不當勇於行而履危蹈禍
斯道也唯武人用之以爲王事一於進以行其志之
剛則可故爻辭於啞人凶後言之用各有當也

九四履虎尾愬愬終吉

愬愬驚懼之貌上三陽虎之象也四居其末是正履
虎尾之上者然以剛居柔是質雖剛而志則柔故能
愬愬然知所畏懼而終於獲吉

象曰愬愬終吉志行也

三與四皆履虎尾者三凶而四吉何也三柔而志剛
勇於行而不知懼四剛而志柔謹於行而知所懼也
懼則能防是以終吉其吉者上進之志行也

九五夬履貞厲

履之卦義履剛也履剛之道尚柔不尚剛也五雖中
正以履帝位然以剛居剛而承乘應皆剛是一於尚
剛者也夬履謂決於行也一於任剛決行而不顧則
於中正之道豈能无疚乎若貞固守此危道也故曰

貞厲

象曰夬履貞厲位正當也


居得致之位據得專之勢而任剛決行借使失得相半乖誤亦多矣雖得正亦危道也其可貞固守之乎上九視履考祥其旋元吉

履之爲道尚柔不尚剛也上九以陽居陰既能自抑其乾健之剛且獨應夫兌說之柔是處履之時尚柔而行者莫如上九其善可知考成也祥善也旋歸也

言上九所視所履爲能成履道之善於履之終而歸於大吉者也故曰其旋元吉

象曰元吉在上大有慶也

上履之終也元吉在上謂大善於終也大善於終者則其人大有福慶可知也



乾下
坤上

泰通泰也爲卦乾下坤上陽降而下陰騰而上天地交而二氣通萬物遂其生成故爲泰

泰小往大來吉亨

泰否皆乾坤互易全體以成卦故止以陰陽言之小陰也大陽也往謂往於外來謂來於內陽下降陰上騰陰陽之氣交天地之泰也君推誠以接其下臣竭誠以事其上上下下之志通朝廷之泰也君子在內小人在外各得其宜天下之泰也泰之道吉且亨也泰否吉凶之變无他陰陽邪正內外消長而已

彖曰泰小往大來吉亨則是天地交而萬物通也上下

交而其志同也內陽而外陰內健而外順內君子而外小人君子道長小人道消也

內陽外陰以卦體言內健外順以卦德言天地上下之交通君子小人之內外以人物言泰者其天地人物至和極治之時也

象曰天地交泰后以財成天地之道輔相天地之宜以左右民

天地交而陰陽和萬物遂所以爲泰人君象之財成

其道輔相其宜以左右民財如達財之財因而篤之
以成其生養之道輔如輔弼之輔助而相之以贊其
化育之宜此天地之間所以无一物之不泰也古財

材直

初九拔茅茹以其彙征吉

初以剛正居下是君子而在下者也時既泰則進而
上行茹根之牽連者彙類也君子進必以其類如茅
之根拔其一則牽連而起矣下二陽乃其類也征行

也志行道亦行也故吉

象曰拔茅征吉志在外也

獨善其身者內也兼善天下者外也初九上進之志在天下不在一身故曰在外其孟子所謂達可行於天下而後行之者也

九二包荒用馮河不遐遺朋亡得尚于中行

二以剛中上應於五五以柔中下應於二所謂上下交而其志同者也時既泰矣二居大臣之位所以處

泰之道有四焉必恢舍弘之量以包容荒穢不然則
淺狹多疑而人不安必施剛果之用以濟深越險不
然則循習苟安而事不立必深思遠慮而无幽遐之
遺不然則狃於目前而忘後患必大公至正而无朋
比之私不然則偏於所向而爲害多矣蓋亦以二乾
體也如乾之大故能包荒資乾之健故能馮河覆而
无外故不遐遺剛而得中故能朋亡具此四者所以
能合乎中行之君而致泰之盛也尚尚主之尚配合

也應六五歸妹之義

象曰包荒得尚于中行以光大也

此小象舉一句而下文皆在之例言泰道之所以光明盛大也

九三无平不陂无往不復艱貞无咎勿恤其孚于食有福

三居泰否往來之會陰陽升降之交而當陽進之極履盛滿之地而失泰道之中故爲之戒曰无常安平

而不陂者謂无常泰也无常往去而不復者謂陰將返也此天道之必然君臣能艱危其思正固其守庶可保泰而无咎倘以泰爲可恃不以此理爲可信恬不知恤則將自食其所有之福祿而永終矣食如食言之食没而盡之也

象曰无往不復天地際也

此因陰陽之交際明泰否无常之理以爲戒也

六四翩翩不富以其鄰不戒以字

富實也陰虛陽實不富謂非陽之實也九三已處泰之盛盛則必衰六四則泰運已過故陰乘陽之衰羣然內復率其同類无實之鄰翩翩而來心意相孚不待告戒而自合此泰之變也亦可以見君子之易退小人之易進也有國者可不慎歟

象曰翩翩不富皆失實也不戒以孚中心願也

翩翩而來所謂不富者皆非陽實之賢也羣陰在外非其願欲久矣今四一動皆不待告戒而自孚以其

中心之所願欲在此也

六五帝乙歸妹以祉元吉

六五以柔中之德下應九二剛中之臣順而從之如帝乙歸妹降其尊貴順從於人故能成其泰治之功以受福祉以獲元吉也伊川曰帝乙必古者制王姬下嫁之禮法者

象曰以祉元吉中以行願也

二五居中得中上下交以行其志願故受泰治之福

而得大善之吉也


上六城復于隍勿用師自邑告命貞吝

上泰之終而又以陰柔處之泰復否矣隍城池嚮也
積累以成泰如取隍土累以成城今泰復否如城之
頽復返於隍也勢而至此自治不暇其可用師衆以
治人乎故曰勿用師唯可行其告命於已之私邑以
自守故曰自邑告命蓋勿恤其字以至於此雖得其
正亦可羞吝矣若以剛健之才處之扶顛持危亦自

有道故不曰凶而曰吝坤體故曰師曰邑

象曰城復于隍其命亂也

泰一變而爲否其上下分崩離析之時雖有命亦亂矣告自邑所以救此亂也



坤下
乾上

否否塞也與泰相反爲卦坤下乾上是天地之氣不交上下之情不通所以爲否

否之匪人不利君子貞大往小來

人與天地並立爲三而所以維持三極者人也人之所以爲人者盡人道而已今否之世以言天地則天地不交以言萬物則萬物不遂以言天下則天下无邦是入之道亡矣故曰否之匪人謂否之世非入道也不利者舉天下事事物物皆不利也乾不言所利謂所利者非止一物此不言所不利謂所不利者亦非止一事一物也當此之時爲君子者尤宜貞固以自守故曰君子貞蓋陽往陰來小人道長君子道消

也

彖曰否之匪人不利君子貞大往小來則是天地不交而萬物不通也上下不交而天下无邦也內陰而外陽內柔而外剛內小人而外君子小人道長君子道消也易中極亂之辭未有甚於此者經曰否泰反其類也唯反其類故其事一切相反然則人於陰陽內外消長之機可不戒哉可不慎哉

象曰天地不交否君子以儉德辟難不可榮以祿

夫子大象例於各卦象義之外別取其一端以用之
若彖以不利君子貞爲句則大象取義不如此重複
矣誠齋曰君子當否之時唯以儉德辟難而已辟難
可也何必儉德非能忍天下不可忍之窮不可辟天
下不可辟之難窮之不忍而難之是辟辟之未幾而
誘之者至矣誘之所投禍之所隨也唯不可榮以祿
則免矣

初六拔茅茹以其彙貞吉亨

否之時三陰在下亦牽連同類而進故亦有拔茅茹之象蓋小人道長之時各從其類也然六方在初其小人之惡未著也其本心之正尚存也猶可示之以趨吉避凶之門故戒之以貞正則亦吉亦亨不必爲小人之歸也曰貞不曰征者亦已有懼其進之意象曰拔茅貞吉志在君也

小人之進其志在於得君而已正否不顧也其孟子所謂有事君人者以事是君爲容悅者也故戒之以

貞而示之以吉 或問曰舊說皆謂易爲君子謀否
下三爻以君子方否而在下者言之而子不以爲然
何也曰聖人設卦觀象以繫辭明取內小人外君子
爲否卦之義果如諸說則以何者爲否且以下三陰
爲君子上三陽復以君子當之則剛柔善惡混无差
別何以爲易

六二包承小人吉大人否亨

六二質雖陰柔而居中得正處否之時猶小人中之

君子也故其所承順者不但九五之君而已能并上三陽而包容承順之故曰包承言兼包其所承之陽也此亦小人之吉九五大人之否賴之以濟故曰大人否亨是以二曰小人吉五曰大人吉君臣對言中正故也

象曰大人否亨不亂羣也

處羣陰之中而中正獨異是不雜亂於其羣者也故大人之否賴之以亨

六三包羞

陰陽內外雖不同往來循環則一也三居否道將變之時陰道已窮之際不中不正居下之上衆陽將復其勢豈能久安若陽剛君子則見幾而作矣唯陰柔小人故包羞忍恥以苟富貴不忍捨去雖否道未革未至凶咎然識者亦已羞之矣

象曰包羞位不當也

以陰居陽在下之上位不當也其甘於包羞而不退

者是不知其位之不當身之將危也

九四有命无咎疇離祉

四以陽剛當否運已革之時與五同德而處近臣之位是有濟否之才得君而得位者也然已然而君不然雖有才有位其何爲乎今臣有才而君命之君有命而臣行之豈唯濟否而无咎且使疇類皆離其福焉蓋君子之類由是而得伸也古疇儔離麗通

象曰有命无咎志行也

既有命則上之意不惑於羣小可知矣故四可无咎而濟否之志得行也

九五休否大人吉其亡其亡繫于苞桑

九五剛健中正之大人也故能以大人之道休息天下之否否之休大人之吉也然否雖休息猶非泰也故有其亡其亡之戒謂長顧却慮常防否之復來曰其亡矣其亡矣必益爲安固之道如繫物於苞桑焉蓋桑根深固苞而叢者其固尤甚故繫辭曰安而不

忘危存而不忘亡治而不忘亂是以身安而國家可保也

象曰大人之吉位正當也

有大人之道而正當至尊之位故能休息天下之否是以吉也无其位雖有其道將何爲乎


上九傾否先否後喜

上以陽剛之才當否運之終故能傾時之否以復於泰然不可以无警懼之心當以傾否爲先喜泰爲後

而後可以保其否之必傾也

象曰否終則傾何可長也

否終則傾理之常也何可長者幸之之辭也



離下
乾上

同人與人同也爲卦離下乾上乾天也天上行離火也火亦炎上是火同於天也今卦不名同天而名同人者六二一陰爲成卦之主而居下體人之位上下五陽皆欲同之也故卦曰同人而象取同乎天爲大

同之義

同人于野亨利涉大川利君子貞

野謂曠野取曠遠廣大之義同人者天下大同之道
聖賢至公之心也故取曠遠廣大之野无纖毫蔽匿
之私如是而同乃同人之道故亨亦與人同者无往
而不亨无險之不濟況成卦之主文明中正而行乾
之健其亨其利涉大川宜也然同不可以苟同必利
乎君子之正道亦以二居得其正而承乘應皆正故

也若同不以正則非吾所謂同矣

彖曰同人柔得位得中而應乎乾曰同人

以成卦之主釋卦名義柔謂六二乾謂九五二以中正而應乎中正之五是五與之同故曰同人

同人曰美文同人于野亨利涉大川乾行也文明以健中

正而應君子正也唯君子爲能通天下之志

至公无私者天道也同人所以亨所以利涉者以天道行也且二以離之文明行乾之剛健而中正相應

乃君子同人之正道故天下之志萬有不同而君子一以此道貫而通之則不同者亦同矣故曰唯君子爲能通天下之志通者貫而同之與天下爲大同也

象曰天與火同人君子以類族辨物

有所不同而與之同者同人之義也天與火本非同類天上行火亦炎上而與之同故爲同人之象族者宗之別同而異者也萬物不同而同稟陰陽以生異而同者也君子觀天與火同之象於族之同而異者

則類而聚之使各同其同而親其親於物之異而同者則辨而別之使同其不同而羣以分如是則天地閒人與物同者固同而不同者亦同矣

初九同人于門无咎

門限隔内外者也卦唯二之一陰衆陽之所欲同初以陽剛上進一出門即與之遇初非有意於同而得其所同者无爭於人何咎之有

象曰出門同人又誰咎也

出門之初即與人同見出於无意而得其所同者故
不取咎於人人亦无咎之者故曰又誰咎也

六二同人于宗吝

宗所尊也同人者以聖賢至公之心行天下大同之
道今二偏應於所尊之五不能與天下爲大同故吝
然彖取六二之柔中正應九五之剛中正爲同人之
正道而爻辭乃若此蓋彖以全卦之體而言則爲中
正相應爻則據所居之位而言則其用爲甚狹矣

象曰同人于宗吝道也

二居大臣之位而處同人之世止與所尊之五同律以同人大公之道則爲私狹故曰吝道也

九三伏戎于莽升其高陵三歲不興

莽林莽也四陰位陰則暗且居上之下三視之林莽之象也陵丘陵也三陽位陽則高且居下之上二視之丘陵之象也三以剛居剛而又不中處同人之世而无應與下比於二而二以中正上應於五三不顧

義挾其剛強欲奪而同之上則欲拒五之應乎二乃
伏其兵戎於同惡之林下則欲迫二之同乎已乃升
其所據之高陵以瞰之然於義不直故三歲不興謂
三變而正遇九五之剛中正其奸終不敢發也未發
故无凶咎

象曰伏戎于莽敵剛也三歲不興安行也

五剛中正下同二之柔中正於義其可敵乎故伏戎
升陵至於三歲而終不敢發安行者言其剛強不義

安得而行也

九四乘其墉弗克攻吉

城牆曰墉所以捍隔外侮者謂三也自上乘下曰乘謂四居外卦剛而不中不正下无應與欲內同六二而爲九三所隔四挾其居高之勢乘其墉而攻之然三剛而四柔其勢不敵四亦自知其義不直反而不攻亦由處柔而善變變而得宜故吉

象曰乘其墉義弗克也其吉則困而反則也

二實應五而欲以力奪之三不犯已而欲以勢乘之
義弗克也始也挾勢用剛雖已違則及其困也能反
於不過剛之則是以能吉

九五同人先號咷而後笑大師克相遇

五剛中正二柔中正相與一心而同者也爲三四所
隔不勝憤抑至於號咷然邪不勝正終必相遇故後
笑必至於大師以克勝之而後得遇者以彼同惡者
皆剛強而此同心者柔弱也伊川曰五君位而爻不

取人君同人之義者蓋五專以私嬖應於二失其中
正之德而不能與天下爲大同非君道也又先隔則
號咷後遇則笑是私情也故不言君道而止明二人
同心不可間隔之義

象曰同人之先以中直也大師相遇言相克也

先所以號咷者以中誠理直不勝忿切而然也必大
師克之而後能遇者以隔之者彊也

上九同人于郊无悔

人所居爲邑邑外曰郊是去人遠之地喻上九居一卦之外去二之人遠也蓋二爲成卦之主以一陰爲衆陽之所欲同者五爲正應同之專者也初在下一出門即與之同无爭於五故无咎三四則伏戎乘墉而起爭矣上在五後其志未嘗不欲同乎二唯去二已遠五又隔之於外如在邑外之郊故不得而同唯其不得而同故亦无悔雖无悔而於同人之道亦不足取也

象曰同人于郊志未得也

郊與野異野則曠遠廣大一有人無不見者是雖不求於同而無不同也郊則限於人所居邑之外是雖欲同而不可得而同也然則于野者無心於同而無往不同于郊者有志於同而不得而同也故曰志未得



乾下
離上

大有所有之大也爲卦乾下離上火在天上容光必

照无所不有大有之象也又陽爲大五以一陰居尊
上下五陽皆爲所有又有其大之象也五以謙虛處
高明以卑柔處剛健亦爲能有其大之義故爲大有
大有元亨

五爲成卦之主以文明之德得中而居尊處大有之
世而順乎乾是有德有位順天而行者也何往不亨
故曰元亨元有大善之義若非明非中非順天之道
則雖大有而不善及不能亨者有之矣

彖曰大有柔得尊位大中而上下應之曰大有

以成卦之主釋卦名義柔謂六五上下謂五陽五得中而居尊以柔而處剛爲能盡大中之道以用於天下故上下之陽歸之是爲大有

其德剛健而文明應乎天而時行是以元亨

以卦德釋彖辭內剛健而外文明有其德矣五又以柔中而順乎乾是有剛健文明之德順天道而時行者也是以元亨

象曰火在天上大有君子以遏惡揚善順天休命

火在天上洪纖高下无往不照大有之象也君子觀此則知大有之世善善惡惡无所不有或遏或揚亦以順天之道承大有之休命也

初九无交害匪咎艱则无咎

五以一陰居尊爲成卦之主厥孚以交上下而上下應之故二曰往三曰亨四匪其彭上履其信而思其順皆言其交於五也今初曰无交害豈非初獨處下

不得交於五爲有害於上下應之之義乎然初陽剛
得正其无交於五非其咎也故不曰无咎而曰匪咎
諒其在下也況交道亦不可輕易使失之輕易而不
艱或以苟合爲交則是徒知无交之害而不知苟合
之爲咎也故又曰艱則无咎予其守正也
象曰大有初九无交害也

大有初九云者言大有之世而初九孤遠在下无交
於五於上下應之之義不能无害也

九二大車以載有攸往无咎

二健而居柔剛而不過處大有盛而未滿之時如以大車載物容之有餘也而又有剛中之德上應柔中之君不但可以載亦可以往故无咎若至於盛滿則是車盈不可載亦不可往矣焉得无咎乎此聖人因九二健而得中發之以爲處大有之法

象曰大車以載積中不敗也

積中不敗者言人之積載得中則止過則必有覆車

折軸之憂焉得不敗

九三公用亨于天子小人弗克

亨春秋傳作享古亨享通朝獻也三居下之上公侯之位也其土地人民之富皆天子所有於大有之時以陽剛得正之君子處之必不私其有而以奉上故曰亨于天子以過剛不中之小人處之必擅爲己有因爲不順故曰小人弗克爻一也用之則存乎其人象曰公用亨于天子小人害也

小人无剛正之德故處大有則或爲害而大有亦適足爲小人害也

九四匪其彭无咎

四當大有過中之時有之盛者也且體剛而居不正之位上近柔中之君盛極則衰憂至矣唯剛明用柔知自損抑匪其彭而不敢以盛多自處故得无咎詩曰行人彭彭盛多之貌也

象曰匪其彭无咎明辯晷也

哲明之至者不處其盛多而得无咎者以其辯明事
理之哲也居柔故能匪彭離體故能明哲

六五厥孚交如威如吉

虛中故有孚五以虛中之孚居尊位而上下交如以
成大有然以一柔而交眾剛雖能推誠以得其心然
易而无備則或生侮慢故必濟之以威如斯能獲吉
蓋處大有之時居眾剛之上不可一於柔也

象曰厥孚交如信以發志也威如之吉易而无備也

一人之誠固足以發上下交如之志然以一陰主衆陽亦不可易而无備故必濟之以威如則吉

上九自天祐之吉无不利

以剛明之至而自居於陰當大有之極而澹然退處是能不有其有持謙虛以處盛滿者也滿招損謙受益時乃天道上九能於大有盛滿之時而益謙益退不居其有宜其自天祐之吉无不利也

象曰大有上吉自天祐也

大有上吉者言居大有之上履盛滿之極而能謙虛
不居其有而獲天祐也大有而能謙其應如是歟夫
子於繫辭復以交於五取義而言履信思乎順又以
尚賢也若曰五以中虛之孚柔順之德交于上下衆
陽皆自下應之九獨應之於是履其孚信思其柔
順也五又能以謙柔尚上九之賢是君臣上下處大
有之極皆能不有其有順乎天而行是以自天祐之
吉无不利



艮下
坤上

謙謙退也有而不居之謂爲卦艮下坤上地中有山也
以山之高而居地之下謙之象也以崇高而處至卑之下謙之義也故爲謙

謙亨君子有終

謙之成卦九三也三以一陽止乎內而順乎外故亨
在人以謙自處不矜不伐而衆自與之亦无往不亨
故曰謙亨凡謙之道先自卑而後尊先自晦而後顯

是无其始而有其終也故曰有終謙而有終者其唯君子乎

彖曰謙亨天道下濟而光明地道卑而上行天道虧盈而益謙地道變盈而流謙鬼神害盈而福謙人道惡盈而好謙謙尊而光卑而不可踰君子之終也

以成卦之主釋彖辭而極言謙道以爲訓也天高而在上今一陽下濟以成其化育之功而其道光明此言謙之亨也地卑而在下今坤道上行以蘊夫艮山

之高而得其增益此言謙之有終也天道虧益者盈
虛消息之謂也地道變流者圯頽傾注之謂也鬼神
造化之跡凡過而損不足而益者皆是也天地鬼神
猶然人之道可知矣自天道虧盈以下聖人所以戒
盈而勸謙也故人居尊而能謙則德愈光明居卑而
能謙則人亦莫能過之是不有其始而有其終君子
之道也

象曰地中有山謙君子以裒多益寡稱物平施

山高而居於地之下謙之象也坤卑而蘊夫山之高謙之益也君子以之裒取多者增益寡者所以稱物之宜而平其施也尊卑小大遠近親疎各當其分者稱物也父乾母坤民胞物與一視同仁者平施也皆損高增卑之事故以取象

初六謙謙君子用涉大川吉

六體柔謙德也初處下卑位也以柔處下謙之又謙君子之行也謙謙之行不爭而勝衆无不與雖涉險

難亦可无患况居平易乎故吉初前互體爲坎而進於坤亦有涉川而吉之象

象曰謙謙君子卑以自牧也

牧有收而養之之意言君子以謙卑之道收斂身心以養其德故无不吉

六二鳴謙貞吉

誠積於心而發於聲曰鳴柔與下皆謙也二以柔居柔而位乎下得中且正是謙而滿其所願欲者也既

得所欲其誠積於中隨所至而發於外故鳴此謙之
正吉之道也

象曰鳴謙貞吉中心得也

言二中心得其所欲故鳴

九三勞謙君子有終吉

三以一陽爲成卦之主而上下從之是一君子上爲
君所與下爲衆所歸於上下謙退之時獨任重而有
勲勞者也持此而處謙是又勞而不伐有功而不德

者也是以已愈謙於前人愈尊於後故曰有終吉

象曰勞謙君子萬民服也

萬民服者非服其有勞服其有勞而能謙也

六四无不利撝謙

撝發揮之謂四柔而得正上而能下固謙者也況上承柔謙之君下乘勞謙之臣已居其間動作施爲无所不利於用謙唯謙則處上處下亦无不利

象曰无不利撝謙不違則也

言六四撝謙故處上處下皆不失其當然之則也
六五不富以其鄰利用侵伐无不利

易例陰以陽爲富君以臣爲鄰五陰柔是不富也以
柔處謙是不有其富也四近臣二大臣亦陰也奚其
富蓋卦唯三之一陽二與四皆謙退而推讓之使輔
於五是五本不富以其臣鄰而富也亦以見謙之世
上下皆謙之盛德也然謙固吉德而君道則不可一
於用謙必用侵伐使威德並著然後盡君道之宜蓋

三以一陽處衆陰之間有統衆行師之象五爲之君上爲之應故二爻有侵伐行師之辭亦以救柔謙之過以爲處謙之法

象曰利用侵伐征不服也

謙至九三萬民服矣豈五之謙德如此猶有不服者邪蓋服九三者服其有勞而能謙也君道則不可一於用謙故必侵伐乎謙德之所不能服者然後爲宜也

上六鳴謙利用行師征邑國

謙豫反對卦也皆以一陽爲成卦之主謙之上即豫之初豫之初曰鳴豫以應四也此曰鳴謙豈非以應三乎上六以柔居柔處謙之極而退居无位之地本謙退之至者然三爲成卦之主得時得位而獨與之應故上六不得遂其謙退之志而發於聲故曰鳴鳴其謙退而未得之志也然已愈退而人愈歸故利用行師但謙而處柔志終不遠故止利於征已邑國以

自治而已坤為邑國三有統眾行師之象

象曰鳴謙志未得也可用行師征邑國也

凡人得其所欲與不得其所欲者誠積於中必發於外故曰鳴二之鳴得其所欲故曰中心得上之鳴不得其所欲故曰志未得以謙退未得之志終不在遠故用行師止可以自治於內也



坤下
震上

豫安也樂也為卦坤下震上順而動也順理而動則

安動而和順則樂豫之義也雷動而出於地萬物皆
悅豫豫之象也故爲豫

豫利建侯行師

四以一陽爲成卦之主居公侯之位上下順而從之
建侯之象也一陽統衆陰以順而動行師之象也建
侯行師二者慶賞刑威雖不同然皆上動而下順欲
使夫人安且樂則一也故豫利建侯行師

彖曰豫剛應而志行順以動豫

以成卦之主及卦體釋卦名義四以一陽爲上下所應而其志得行故豫坤順震動爲順以動天下唯順理而動則安且樂故曰豫

豫順以動故天地如之而況建侯行師乎天地以順動故日月不過而四時不忒聖人以順動則刑罰清而民服豫之時義大矣哉

以卦德釋彖辭而極言之也豫之爲豫順以動也天地間不過一至順之理而已故天地之運以順而動

則日月四時不差忒而萬化成聖人之治以順而動則政刑清簡而萬民服然則動必以順天地聖人且不能違而況建侯行師乎豫之時之義豈不大哉

象曰雷出地奮豫先王以作樂崇德殷薦之上帝以配祖考

雷者陰迫於陽而發於聲者也潛在地中物猶鬱遏奮出地上則物皆和暢豫之象亦樂之象也故先王以之作樂褒崇功德極其盛則薦之上帝以配祖考

言和樂之至也禮云春禘秋嘗禘有樂嘗无樂震爲春是專以禘言之也

初六鳴豫凶

四爲卦之主以一陽得時而在上初以陰柔不中不正而獨與之相應是小人處豫之時而專得寵於上者故其志意不勝悅豫至發於聲而鳴於外輕淺如是宜其凶也

象曰初六鳴豫志窮凶也

初以陰柔卑下而專上之寵以此處豫宜其氣驕志滿以招凶禍故曰志窮凶也

六二介于石不終日貞吉

豫主乎樂然豫樂易以溺人溺則反而憂矣卦獨此爻居中得正而又无應有自守之象是上下皆溺於豫而獨能以中正自守介然如石之安靜不爲物慾所移故其處事思慮精詳能見憂樂倚伏之幾當去則速去之不俟終日此六二貞正之吉也夫子因二

之見幾於繫辭極言知幾之道曰知幾其神乎吉之
先見者也幾有吉有凶獨言吉者見之於先則无凶
矣

象曰不終日貞吉以中正也

唯中與正故能守之堅而去之速處豫之善者也

六三盱豫悔遲有悔

盱上視也遲固戀也六三質柔志剛不中不正處上
之下下之上處上之下故仰盱而貪慕乎四由豫之

樂而四不與此悔之道處下之上故遲疑而固戀其
居人上之樂而不見幾亦悔之道此文正與六二相
反盱則不能介于石遲則不能不終日中正與不中
正故也

象曰盱豫有悔位不當也

陰柔處豫而不正宜其盱悔而遲有悔也

九四由豫大有得勿疑朋盍簪

四成豫之主以陽剛之才居大臣之位六五之君順

而從之上下之陰朋而順之是得君專而衆由之而得豫者也故曰由豫上下之豫由已而得則是其志得以大行也故曰大有得當此大有得之時上承柔弱之君而處多懼之地寧无憂疑乎故聖人安之曰勿疑勿疑之道在總盍上下之朋以歸于君如簪總盍衆髮以歸于上則所謂大有得者亦大臣之事也何疑之有

象曰由豫大有得志大行也

上下皆由四而得豫是四之志得以大行也

六五貞疾恒不死

六二貞則吉得中得正而不爲豫所溺也六五貞則疾中而不正而溺於豫也五君也處豫之時而不以正以柔應柔而不自立四以陽剛得時得衆於下而已乘其上是柔弱耽溺之君而遇剛強權重之臣雖處豫其能安乎故疾疾者謂乘九四而不安也疾而曰貞者謂雖不正而猶得中得位也恒不死者謂雖

不安然權失而位未亡也是逸樂荒怠之君徒擁虛器之所爲者豫其可溺歟

象曰六五貞疾乘剛也恒不死中未亡也

五處豫而不正以柔而乘剛疾也中未亡位未去故貞疾而恒不死也

上六冥豫成有渝无咎

以陰處陰居豫之極是昏昏冥冥於逸豫之中其咎已成矣然能知豫樂之不可久幡然渝變則咎可无

也蓋上雖陰柔然以震體居豫之終終則能變故也
不言冥之凶但言渝之无咎聖人所以開遷善之門
也

象曰冥豫在上何可長也

豫至於上極矣極則不可以久速渝可也



震下
兌上

隨從也爲卦震下兌上兌說於上下動而從之隨之
象也伊川曰動而說說而動隨之義也雷震於澤中

澤隨而動亦隨之象故為隨

隨元亨利貞无咎

隨從也以已從物物來從已彼此相從无不亨者且初上為成卦之主皆得其正二與五又以中正相隨此隨之善可致大亨故曰元亨隨而得其正乃可无咎若所隨不正雖大亨亦不免於咎也故又曰利貞无咎春秋傳穆姜曰有是四德隨而无咎我皆无之豈隨也哉其言四德雖非經旨言隨之无咎則易之

意也

彖曰隨剛來而下柔動而說隨

以成卦之主及卦體釋卦名義隨之成卦初九上六也乾上之剛來於內而下坤之柔是以上下下以貴下賤此物之所以說隨也乾剛一來而震兌之體成震動兌說動而說說而動故隨

大亨貞无咎而天下隨時隨時之義大矣哉

王肅本作天下隨之隨之時義大矣哉今從之隨之

大亨利於貞正所隨不正亨亦有咎故曰大亨貞无咎亦謂初上成卦之主皆得其正而二五亦隨之以中正是天下隨之也時義者時之宜也聖人之治隨時宜而變通之如時乎揖讓不得不揖讓時乎征伐不得不征伐穴居易而棟宇結繩易而書契皆時之宜是豈強天下使之隨者斯時斯義非可與權者不能與於此故曰大矣哉

象曰澤中有雷隨君子以嚮晦入宴息

此夫子以時取象而用之允正秋也雷乃收聲以息
君子以之隨時之宜取其至明至近者言之嚮昏晦
而入居於內宴息身心起居之隨時宜也推此以往
動靜云爲君子其可違時宜而不隨乎

初九官有渝貞吉出門交有功

官主也渝變也唯正是從者隨之義初居隨之時所
主以相隨者四也而四爲三所隨不與初應是所主
者變也所主既變則唯正之隨庶乎獲吉六二居中

得正志隨於初者也故初一出門而與之交二即說於相隨陰陽交則有功矣

象曰官有渝從正吉也出門交有功不失也

初之所主者既變而他則唯從乎正庶可獲吉故一出門而交乎中正之二雖非正應然隨得其正亦不爲失也

六二係小子失丈夫

隨從也陰從陽者也二應五而比初初近而五遠二

處隨之時若不自守以須正應則將係初之小子失
五之丈夫矣二中正雖不至是但以陰柔處隨不得
不戒

象曰係小子弗兼與也

人之所從不正則邪不非則是无兩從之理言二若
係於初則必失於五弗兼與者戒二使之一於從五
也

六三係丈夫失小子隨有求得利居貞

三近於四而遠於初者也隨之時陰必從陽然上隨則善下隨則暗舍下從上得隨之宜四亦无應无隨之者得三隨之必相親善故三有求必得言事事得其所求也然非已正應則有枉道之嫌故戒之曰利居貞言不可枉道隨人以徒遂其所求也三不正故戒

象曰係丈夫志舍下也

舍下從上如昏之從明事之從善君子之隨也

九四隨有獲貞凶有孚在道以明何咎

得下之應衆之隨君道也今九四以陽剛之才逼君位之近初應之二與三隨之是人臣而得在下衆心之隨者雖正亦凶蓋位極者不无逼上之嫌勢重者不无專強之慮唯中存事君之誠外盡爲臣之道以明哲處之則不但可以免危疑亦可以保名節矣又何咎哉亦以陽剛君子而用柔故能變凶而无咎象曰隨有獲其義凶也有孚在道明功也

能變凶而无咎者剛明之力也

九五孚于嘉吉

嘉善也九五以陽剛中正之德說而隨六二柔順中正之賢是其中誠樂善隨得其正者其吉可知

象曰孚于嘉吉位正中也

處正中之位由正中之道以應正中之臣故其從善之心出於誠也

上六拘係之乃從維之王用亨于西山

以說之至居隨之極得人之隨固結而不可解无以爲喻若拘而係之繫而維之雖逃之而不可脫況可得而閒之乎其太王享王業于西山民之從之也如是夫

象曰拘係之上窮也

窮極也上窮者言在上而處說隨之極也



巽下
艮上

蠱壞也事也壞乃有事也爲卦巽下艮上巽懦而艮

止事之所以壞也乾陽止於上坤陰巽於下上下不交泰之壞也二體皆以柔承剛其象則以風載山虛而不固勢必壞也且山下有風撓壞其物皆蠱之象故爲蠱在文爲蟲皿皿之有蟲其蠱壞也可知

蠱元亨利涉大川先甲三日後甲三日

以卦體言巽懦而艮止所以成蠱以卦德言事止於巽順可致大亨然蠱不自亨必不憚艱險以修飭之故利涉大川蠱之成卦初與上也故有先甲後甲之

象甲者日之始事之端也先甲三日辛也謂事之已壞者飭而新之後甲三日丁也謂事之未壞者丁寧而使之勿壞如此則可以飭蠱而致大亨也

彖曰蠱剛上而柔下巽而止蠱

以成卦之主及卦德釋卦名義蠱之成卦初六上九也由二爻變而成艮巽皆剛上而柔下柔不足以承剛下巽而上止弱不足以立事故曰蠱

蠱元亨而天下治也利涉大川往有事也先甲三日後

甲三日終則有始天行也

釋彖辭以言飭蠱之道飭蠱至於元亨是天下之亂者復治矣然事不自治必涉艱險以往濟之然又不可以徒往必思慮周悉逆防其壞於未蠱之先整飭其壞於既蠱之後故先後各三日思之詳慮之遠也蠱者其亂之終治之始終則有始乃天道也蓋亦初終二爻爲成卦主故取先後始終以爲義

象曰山下有風蠱君子以振民育德

山下有風物皆撓壞蠱之象也君子以之於民俗之頹壞者振起而作興之使壞者復飭已德之未壞者養育而培成之使不至於壞亦飭其已壞防其將壞之事也

初六幹父之蠱有子考无咎厲終吉

蠱之六爻皆言飭蠱之道蠱在前飭在後故以父母之蠱取義父母之蠱子可辭其幹乎初在下而爲主於內是子之幹蠱者也子承父之蠱而能幹則乃父

為有子有子則乃父之咎可无矣然初弱於才幹之
非易必兢兢業業常懷危厲之心以處之庶乎終吉
象曰幹父之蠱意承考也

言考則前人也為子者善繼前人之志善述前人之
事則足以承乃考之意矣故曰意承考也

九二幹母之蠱不足貞

二以陽剛上應陰柔故曰幹母之蠱言母則在堂者
也二以剛承柔而幹其蠱唯當以巽順處之若貞固

用其陽剛矯拂太過則失其爲子之道亦安能集事乎故有不可貞之戒

象曰幹母之蠱得中道也

言幹母之蠱者所貴乎得中道而不可過於剛也

九三幹父之蠱小有悔无大咎

言父不言考則父在也父在而子幹其蠱非剛固不可然過剛亦不可三以剛居剛未免過乎剛然居得其正是知其蠱不可以不飭者也故小有悔而无大

咎

象曰幹父之蠱終无咎也

尚剛非子之道然用之於幹蠱則亦何咎哉

六四裕父之蠱往見吝

四當初二三幹蠱之後蠱亦少飭矣而又以柔居柔而處艮體亦止宜以寬裕之道處之可徐而不可急可紓而不可迫若勇而大有爲則不唯才弱不勝而事愈壞矣故往則見吝

象曰裕父之蠱往未得也

四雖得正而弱於才往未得者戒其欲速則不達也
六五幹父之蠱用譽

五君也承父之業其盈盛則當持而守之其蠱壞則
當飭而治之今五以柔弱之資承父之蠱疑若不善
幹者而用譽何也蓋下有剛中之臣爲之輔佐五能
以柔中之德信而任之是以繼志述事享有令名也
象曰幹父用譽承以德也

以已有柔中之德承父之蠱而在下之賢又承之以剛中之德也

上九不事王侯高尚其事

上亦成卦之主乃以剛明之才而居艮止之極於多事之世而處无位之地是賢人君子識時宜守志節者也況當蠱之終乃壞之極不可爲也居卦之外不在其位不當爲也下无係應人不我知不必爲也然則上九之不事王侯高尚其事宜也王侯謂五與四

剛止於終故不事民體之上故高尚

象曰不事王侯志可則也

此其節不但爲天下之所高而其志實可爲天下之法也



兌下
坤上

臨近也亦自上臨下之義爲卦兌下坤上澤上有地岸也臨近乎水也又二陽浸長而幾於乾世道既復而近於泰故爲臨

臨元亨利貞至於八月有凶

剛長而嚮盛則其亨也必大善且二陽上進前順而
无阻故曰元亨然二體柔說而成卦之主六三也又
不得其正故戒之曰利貞八月有凶者自六三八變
而至觀爲八月卦臨則二陽長於下四陰剝於上觀
則四陰長於下二陽剝於上矣故曰有凶聖人於此
二陽長而陰消之初爲二陽消而陰長之慮也蓋方
盛而慮衰則盛可久若既衰而後爲之慮則无及矣

彖曰臨剛浸而長

以卦德釋卦名義謂剛浸長而近於泰故曰臨

說而順剛中而應大亨以正天之道也至于八月有凶消不久也

釋彖辭下說而上順二又以剛中之德上應柔中之五得中用中以相應故大亨中則正矣大亨而以正天之道也今成卦六三既不中又不正故有八月之凶謂成卦六三八變爲八月之觀則二陽消於上矣

故曰消不久也不久者臨與觀僅一反對亦以見其
近也聖人治思亂安思危之意遠矣哉

象曰澤上有地臨君子以教思无窮容保民无疆

澤上有地以地臨水以上臨下之象也澤之於地有
潤而无竭故君子以之教人其思无窮地之於澤有
受而无阻故君子以之容民保而无外是二者亦以
大臨小以上臨下之事也故以取象

初九咸臨貞吉

臨之爲卦六三一變則爲泰矣陽剛浸長之時也咸感也陽剛二君子而在下上有虛中好賢之君相與之感過於臨之世故皆以咸臨言之初又剛而得正四復以正應之是以正道獲乎上而志得行也故曰貞吉

象曰咸臨貞吉志行正也

初九之志在於行其正道而又得四以正應之是以吉也

九二咸臨吉无不利

二處剛長之時以剛居中上有柔中之君虛其心與之感過於泰道將成之際故吉故无不利此彖所謂剛中而應者也然初與二皆咸臨初吉而已二吉且无不利者遇君與臣其功用固有間中與不中故也象曰咸臨吉无不利未順命也

君臣感遇固吉无不利然四陰猶盛二陰猶得以間之故雖能以意氣相感而二猶未得以順從上命此

其所以爲二陽之臨而未卽爲三陽之泰也

六三甘臨无攸既憂之无咎

剛長之時上下諸爻皆當位得中之君子獨一六三不中不正而以陰柔居下之上上无應與下畏二陽之逼乃挾其兌說之資行其甘諂之謀是謀也而果行則上不利於國家下不利於其身故曰无攸利處臨之時如六三者不可不憂既知憂之則可无咎憂之如何防八月之凶是也

象曰甘臨位不當也既憂之咎不長也

以柔乘剛不中不正是位不當也故甘以說人既憂之則將去之去之則彼之爲咎不長臨爲泰矣

六四至臨无咎

四居坤體切近允澤故曰至臨言臨近之至也初九賢而在下四近臣也正與之應是又能至臨在下之賢與之共成剛長之治何咎之有

象曰至臨无咎位當也

以陰居四爲得正近君而正爲得位切近下體爲至臨正應初九爲下賢位之當咎之无也

六五知臨大君之宜吉

中庸曰惟天下至聖爲能聰明睿知足以有臨也故知臨爲大君之宜謂六五以柔中之德任九二剛中之賢不自用其知而兼衆知爲知之大是宜爲君而獲吉也

象曰大君之宜行中之謂也


五得中而又任剛中之賢是行其中而盡其爲君之道者也

上六敦臨吉无咎

敦厚也以上臨下臨之義也六居一卦之上與下二陽雖非應比然其象則居高臨下所臨者二陽而已陰必從陽坤體則厚是以厚德而內從二陽之君子故吉故无咎

象曰敦臨之吉志在內也

謂上之志在於內從陽剛之君子也故吉



大易緝說卷四